


ORDO
AD
DIECESANAM SYNODUM
MARIANOPOLITANAM.




MARIANOPOLI

TYPIS PLINGUET ET LAPLANTE

MDCCLXIII.

ORDO
AD
DIOECESANAM SYNODUM
MARIANOPOLITANAM.



MARIANOPOLI
TYPIS PLINGUET ET LAPLANTE
MDCCCLXIII.

ORDO
AD
DICÆCESANAM SYNODUM
MARIANOPOLITANAM.

I. In Synodo diœcesanâ, quæ à proprio cujusque diœcesis Episcopo congregatur, nonnulli ritus et cæremoniæ sunt observandæ quæ, juxta sanctorum rituum traditiones diversorumque conciliorum decreta, retineri maxime decet.

II. Primo erit advertendum ut dies inchoationis hujusmodi Synodi per publica documenta, omnibus qui de jure et consuetudine interesse debent, denuntietur.

III. Diœcesana Synodus Marianapolitana sic conflatur, scilicet: Ex Episcopo Ordinario; ex Ecclesiæ Cathedralis Capitulo ejusdemque Capellanis; ex omnibus et singulis qui in hac Diœcesi beneficia seu officia Ecclesiastica obtinent quibus animarum cura annexa sit; ex Rectoribus Ecclesiarum annexarum; ex Superioribus et Rectoribus Seminariorum, Religiosorum Ordinum, Collegiorum nec non ex Superioribus Ecclesiasticis ac Capellanis monialium seu Virginum Deo dicatarum et ex cæteris omnibus qui quovis jure huic Synodo interesse debent.

IV. Primus et spectabilior locus Episcopo debetur.

Secundum occupat locum Vicarius Generalis. Dignitates tamen et Canonici præferendi sunt Vicario Generali, si sacris vestibus induti ipsi Synodo assistant, nisi ipse pariter sit indutus habitu Prælatitio, Rochetto videlicet et manteletta.

Tertium in Synodo locum occupant Dignitates et Canonici Cathedralis, et post Canonicos, Capellani Capituli Cathedralis, qui ab eo non debent sejungi.

Quartum tenent locum Parochi, in ordine quo Parœciæ præfecti sunt. Quod si plures eodem die præfecti fuerint, spectatur tempus ordinationis; et si etiam in ordinationis die convenient, habenda est ratio ætatis.

Quintum occupant locum Ecclesiarum Rectores annexarum, in ordine promotionis.

Sextum Superiores, Rectores et Capellani supra dicti cæterique qui quovis jure huic Synodi interesse debent, secundum tempus promotionis, Regulares post Sæculares.

V. In Synodo omnia tractantur per congregationes privatas, congregationes generales ac solemnes Sessiones.

VI. Sex sunt congregationes privatæ, scilicet : 1o. de Decretis ; 2o. de Doctrinâ ; 3o. de Liturgiâ ; 4o. de Disciplinâ ; 5o. de Studiis ; 6o. de Administratione temporalium negotiorum Paræciarum ac Ecclesiarum.

VII. Ante Synodum, aliquot congregationes, pro ejusdem directione fieri solent, quibus Episcopus præsideat indutus habitu Prælati-
tuo, Rochetto scilicet et mozettâ. Officiales et ministri deputandi in hujusmodi Synodo, in primâ Sessione postea promulgandi, deliguntur alii ab Episcopo aliique in congregatione consultorum. Episcopus destinare debet Præfectum hospitiorum. In congregatione consultorum deliguntur : 1o. Duo Promotores, unus Urbanus, Foranens alter ; 2o. Synodi Secretarius, quem decet esse aliquem ex Canonicis Cathedralis Ecclesiæ ; isque alium quem maluerit, sibi socium adsciscit ; 3o. Notarius Synodi qui solet esse Episcopi Cancellarius ; 4o. Procurator cleri in unaquaque congregatione privatâ supradictâ qui omnium nomine, ea tamen qua decet modestia, ac reverentia, dicat in Synodo, quæ Clero displicent, quæque ex eis, quæ aut statuta, aut statuenda sunt, difficiliora et aspera ordinantur, etc. ; 5o. Magistri cæremoniarum ; 6o. Ostiarii ; 7o. Æconomus.

VIII. Pridie hujus diei qua inchoanda est Synodus, habebitur prima Congregatio Generalis in qua promulgantur omnia quæ ab Episcopo cum Consultoribus ordinata sunt pro meliori Synodi directione. Quæ Congregatio sic indicitur à Synodi Secretario :

Illmus. ac Revmus. D. D. Marianopolitanus Episcopus universis et singulis qui Synodo Diæcesanæ interesse debent mandat et præcipit ut die....mensis....anni....in....sistant se pro Congregatione Generali habenda.

De mandato Illm. ac Revm.

D. D. Marianopolitani Episcopi.

IX. Per duos aut saltem unum mensem, ante dictam diem, scheda manu Cancellarii subscripta Ecclesiæ Cathedralis valvis affigitur sub hujusmodi, aut simili tenore ; *Synodus Diæcesana N. per Reverendissimum Dominum Episcopum N. indicta hoc anno, etc., mense, etc., die, etc. Deo adjuvante, in Cathedrali Ecclesia inchoabitur.*

X. Rursus tribus proximis diebus Dominicis, ante dictam diem, conveniens erit, si tam in ipsâ Ecclesia Cathedrali, per cancionatorem, quam in singulis Parochialibus Ecclesiis ac Capellis, per Parochos Capellanosque iterum atque iterum denuntietur, populique fideles ad devotionem, orationes, jejunia, Sacramentum Pænitentiae, SS. Eucharistiæ sumptionem aliaque opera adhortantur, ut actio hujusmodi, Deo opitulante, dignum sortiatur exordium, felicemque et fructuosum progressum et exitum habeat.

XI. Illi vero qui in ipsa Synodo interfuturi sunt, moneantur ut ea sedulo curent observari, quæ per sanctum concilium Tridentinum in sessione secunda salubri decreto statuit, nempe de modo vivendi, et aliis in Synodo servandis.

XII. Decens est ut singulis quintis feriis à tempore indictionis Synodi usque ad finem, missa votiva de Spiritu Sancto celebretur, aut si impediatur duplici festo, saltem de illo commemoratio fiat ab Episcopo et a singulis sacerdotibus, quoad ipsa Synodus absoluta et dimissa sit.

XIII. Cum autem prædicta Synodi dies appropinquaverit, ornabitur Ecclesia, ubi Synodus habenda est, festivo et solemniori ritu.

XIV. Sedes Episcopi collocabitur apud altare juxta inferiorem gradum, per quem ad altare ascenditur; et alia sedes in plano altaris.

XV. Disponuntur sedilia ut Dignitates et Canonici Ecclesiæ Cathedralis parati hinc inde sedeant à lateribus Episcopi, vel ante Episcopum semicirculum facientes, ac omnes alii assistentes in convenienti loco appareant.

XVI. In sessione vero et ordine proferendi vota observatum est ut Dignitates et Canonici Cathedralis Ecclesiæ, cum capitulariter procedunt, præferuntur cæteris omnibus; deinde cæteri pro cujuscumque dignitate et gradu.

XVII. Pridie ejus diei quæ Synodus inchoanda erit, debent campanæ Ecclesiæ Cathedralis aliarumque Ecclesiarum, in eadem civitate existentium, solemniter pulsari a primis Vesperis, per totam diem, et ipsa die sequenti, quousque Episcopus ingressus fuerit Ecclesiam.



SESSIO PRIMA.

Prima die Synodi Pontifex summo mane cappa indutus, ab universo clero cum superpelliceis comitatus ad Ecclesiam pergit.

Quibus omnibus Ecclesiam ingressis et ostensis, si ostendendæ erunt, Reliquiis, ut in formâ Cæremoniali Episcoporum præscriptâ, cantabitur missa de Spiritu Sancto solemniter per Episcopum ; et si Festum fuerit duplex, vel dominica, sine commemoratione illorum, et sine Evangelio Dominicæ in fine.

Quâ finita, non autem data benedictione, quæ datur in fine sessionis semper, Episcopus, depositis paramentis missæ propriis, usque ad tunicellam inclusive, et accepto pluviali, accedit coram altari, Diacono et Subdiacono paratis rubeis ornamentis, ipsum hinc et inde associantibus, et ibi ante faldistorium sibi paratum genuflexus, omnibus aliis etiam genuflectentibus, incipit antiphonam.

Exaudi nos, Domine, quoniam benigna est misericordia tua : et secundùm multitudinem miserationum tuarum respice nos, Domine.

Incepto Psalmo, sedet Pontifex, accepta mitra, et sic manet quousque finiatur Psalmus, et Antiphona repetatur.

PSALMUS 68.

Salvum me fac, Deus, * quoniam intraverunt aquæ usque ad animam meam.

Infixus sum in limo profundi, * et non est substantia.

Veni in altitudinem maris, * et tempestas demersit me.

Laboravi clamans ; raucæ factæ sunt fauces meæ : * defecerunt oculi mei, dum spero in Deum meum.

Multiplicati sunt super capillos capitis mei, * qui oderunt me gratis.

Confortati sunt qui persecuti sunt me inimici mei injustè : * quæ non rapui, tunc exolvebam.

Deus, tu scis insipientiam meam : * et delicta mea à te non sunt abscondita.

Non erubescant in me qui expectant te, Domine, * Domine virtutum.

Non confundantur super me, * qui quærunt te, Deus Israel.

Quoniam propter te sustinui opprobrium, * operuit confusio faciem meam.

Extraneus factus sum fratribus meis, * et peregrinus filii matris meæ.

Quoniam zelus domûs tuæ comedit me, * et opprobria exprobrantium tibi ceciderunt super me.

Et operui in jejunio animam meam ; * et factum est in opprobrium mihi.

Et posui vestimentum meum cilicium : * et factus sum illis in parabolam.

Adversum me loquebantur qui sedebant in porta ; * et in me psallebant qui bibebant vinum.

Ego vero orationem meam ad te, Domine : * tempus beneplaciti, Deus.

In multitudine misericordiæ tuæ exaudi me, * in veritate salutis tuæ.

Eripe me de luto, ut non infigar : * libera me ab iis qui oderunt me, et de profundis aquarum.

Non me demergat tempestas aquæ, neque absorbeat me profundum, * neque urgeat super me puteus os suum.

Exaudi me, Domine, quoniam benigna est misericordia tua : * secundum multitudinem miserationum tuarum respice in me.

Et ne avertas faciem tuam à puero tuo : * quoniam tribulor, velociter exaudi me.

Intende animæ meæ, et libera eam : * propter inimicos meos eripe me.

Tu scis improperium meum et confusionem meam, * et reverentiam meam.

In conspectu tuo sunt omnes qui tribulant me, * improperium expectavit cor meum, et miseriam.

Et sustinui qui simul contristaretur, et non fuit : * et qui consolaretur, et non inveni.

Et dederunt in escam meam fel ; * et in siti mea potaverunt me aceto.

Fiat mensa eorum coram ipsis in laqueum, * et in retributiones, et in scandalum.

Obscurentur oculi eorum, ne videant ; * et dorsum eorum semper incurva.

Effunde super eos iram tuam ; * et furor iræ tuæ comprehendat eos.

Fiat habitatio eorum deserta, * et in tabernaculis eorum non sit qui inhabitet ;

Quoniam quem tu percussisti, persecuti sunt ; * et super dolorem vulnerum meorum addiderunt.

Appone iniquitatem super iniquitatem eorum ; * et non intrent in justitiam tuam.

Deleantur de libro viventium ; * et cum justis non scribantur.

Ego sum pauper et dolens : * salus tua, Deus, suscepit me.

Laudabo nomen Dei cum cantico, * et magnificabo eum in laude.

Et placebit Deo super vitulum novellum, * cornua producentem et unguas.

Videant pauperes, et lætentur : * quærite Deum, et vivet anima vestra ;

Quoniam exaudivit pauperes Dominus, * et vinctos suos non despexit.

Laudent illum cœli et terra, * mare et omnia reptilia in eis.

Quoniam Deus salvam faciet Sion, * et ædificabuntur civitates Juda.

Et inhabitabunt ibi, * hæreditate acquirant eam.

Et semen servorum ejus possidebit eam ; * et qui diligunt nomen ejus, habitabunt in ea.

Gloria Patri.

Finito Psalmo, et repetita antiphona, Pontifex surgit, deposita mitra, et versus ad altare, dicit :

Adsumus, Domine sancte Spiritus, adsumus, peccati quidem immanitate detenti, sed in Nomine tuo specialiter aggregati : veni ad nos, adesto nobis, dignare illabi cordibus nostris : doce nos quid agamus, quo gradiamur ostende, quid efficiamus operare. Esto solus et suggestor et effector judiciorum nostrorum, qui solus cum Deo Patre, et ejus Filio nomen possides gloriosum : non nos patiaris

perturbatores esse justitiæ, qui summè diligis æquitatem : ut sinistrum nos non ignorantia trahat, non favor inflectat, non acceptio muneris vel personæ corrumpat ; sed jungere nos tibi efficaciter solum tuæ gratiæ dono, ut simus in te unum, et in nullo deviemus à vero ; quatenus in nomine tuo collecti, sic in cunctis teneamus cum moderamine pietatis justitiam, ut hic à te in nullo dissentiat sententia nostra, et in futuro pro bene gestis consequamur præmia æterna.

Respondetur ab omnibus : Amen.

OREMUS.

Omnipotens sempiterne Deus, qui misericordia tua nos incolumes in hoc loco specialiter aggregasti ; mentes nostras, quæsumus, Paraclitus, qui à te procedit, illuminet et inducat in omnem, sicut tuus promisit Filius, veritatem ; cunctosque in tua fide et caritate corroboret ; ut excitati à temporali Synodo, proficiamus ad æternæ felicitatis augmentum. Per eundem Dominum.... in unitate ejusdem.... Amen.

Finita oratione, Pontifex, accepta mitra, procumbit supra foldistorium prædictum, aliis omnibus genuflectentibus ; et cantores dicunt Litanias.

LITANIÆ.

Kyrie, eleison. Christe, eleison.

Kyrie, eleison.

Christe, audi nos. Christe, exaudi nos.

Pater de cælis Deus,	miserere nobis.
Fili redemptor mundi Deus,	miserere.
Spiritus sancte Deus,	miserere.
Sancta Trinitas unus Deus,	miserere.
Sancta Maria,	ora pro nobis.
Sancta Dei genitrix,	ora.
Sancta Virgo-Virginum,	ora.
Sancte Michael,	ora.
Sancte Gabriel,	ora.

Sancte Raphael,	ora.
Omnes sancti Angeli et Archangeli,	orate pro nobis.
Omnes sancti beatorum Spirituum ordines,	orate pro nobis.
Sancte Joannes Baptista,	ora pro nobis.
Sancte Joseph,	ora.
Omnes sancti Patriarchæ et prophetæ,	orate pro nobis.
Sancte Petre,	ora pro nobis.
Sancte Paule,	ora.
Sancte Andrea,	ora.
Sancte Jacobe,	ora.
Sancte Joannes,	ora.
Sancte Thoma,	ora.
Sancte Jacobe,	ora.
Sancte Philippe,	ora.
Sancte Bartholomæe,	ora.
Sancte Matthæe,	ora.
Sancte Simon,	ora.
Sancte Thaddæe,	ora.
Sancte Mathia,	ora.
Sancte Barnaba,	ora.
Sancte Luca,	ora.
Sancte Marce,	ora.
Omnes sancti Apostoli et Evangelistæ,	orate pro nobis.
Omnes sancti Discipuli Domini,	orate.
Omnes sancti Innocentes,	orate.
Sancte Stephane,	ora.
Sancte Laurenti,	ora.
Sancte Vincenti,	ora.
Sancti Fabiane et Sebastiane,	orate.
Sancti Joannes et Paule,	orate.
Sancti Cosma et Damiane,	orate.
Sancti Gervasi et Protasi,	orate.
Omnes sancti Martyres,	orate.
Sancte Silvester,	ora.
Sancte Gregori,	ora.
Sancte Ambrosi,	ora.
Sancte Augustine,	ora.

Sancte Hieronyme,	ora.
Sancte Martine,	ora.
Sancte Nicolae,	ora.
Omnes sancti Pontifices et Confessores,	orate.
Omnes sancti Doctores,	orate.
Sancte Benedicte,	ora.
Sancte Antoni,	ora.
Sancte Bernarde,	ora.
Sancte Dominice,	ora.
Sancte Francisce,	ora.
Omnes sancti Sacerdotes et Levitæ,	orate.
Omnes sancti Monachi et Eremitæ,	orate.
Sancta Maria Magdalena,	ora.
Sancta Agatha,	ora.
Sancta Lucia,	ora.
Sancta Agnes,	ora.
Sancta Cæcilia,	ora.
Sancta Catharina,	ora.
Sancta Anastasia,	ora.
Omnes sanctæ Virgines et Viduæ,	orate.
Omnes Sancti et Sanctæ Dei,	intercedite pro nobis.
Propitius esto,	parce nobis, Domine.
Propitius esto,	exaudi nos, Domine.
Ab omni malo,	libera nos, Domine.
Ab omni peccato,	libera.
Ab ira tua,	libera.
A flagello terræ motus,	libera.
A peste, fame et bello,	libera.
A subitanea et improvisa morte,	libera.
Ab insidiis diaboli,	libera.
Ab ira et odio, et omni mala voluntate,	libera.
A spiritu fornicationis,	libera.
A fulgure et tempestate,	libera.
A morte perpetua,	libera.
Per mysterium sanctæ Incarnationis tuæ,	libera.
Per Adventum tuum,	libera.
Per Nativitatem tuam,	libera.

- Per Baptismum et sanctum Jejunium tuum, libera.
 Per Crucem et Passionem tuam, libera.
 Per Mortem et Sepulturam tuam, libera.
 Per sanctam Resurrectionem tuam, libera.
 Per admirabilem Ascensionem tuam, libera.
 Per adventum Spiritus sancti Paracliti, libera.
 In die judicii, libera nos, Domine.
 Peccatores, te rogamus, audi nos.
 Ut nobis parcas, te rogamus.
 Ut nobis indulgeas, te rogamus.
 Ut ad veram pœnitentiam nos perducere digneris, te rogamus.
 Ut Ecclesiam tuam sanctam regere et conservare digneris, te rogamus.
 Ut Domnum Apostolicum et omnes Ecclesiasticos ordines in sancta religione conservare digneris, te rogamus.
 Ut inimicos sanctæ Ecclesiæ humiliare digneris, te rogamus.
 Ut Regibus et Principibus Christianis pacem et veram concordiam donare digneris, te rogamus.
 Ut cuncto populo Christiano pacem et unitatem largiri digneris, te rogamus.
 Ut nosmetipsos in tuo sancto servitio confortare et conservare digneris, te rogamus.
 Ut mentes nostras ad cœlestia desideria erigas, te rogamus.
 Ut omnibus benefactoribus nostris sempiterna bona retribuas, te rogamus.
 Ut animas nostras, fratrum, propinquorum et benefactorum nostrorum ab æterna damnatione eripias, te rogamus.
 Ut fructus terræ dare et conservare digneris, te rogamus.

Et postquam dictum fuerit :

- Ut omnibus fidelibus defunctis requiem æternam donare digneris, te rogamus.

Pontifex surget, et baculum pastorem in sinistra tenens, stans versus Synodum, dicit :

Ut hanc præsentem Synodum visitare, disponere et benedicere digneris. te rogamus, audi nos.

Quo facto, iterum accumbit, cantoribus Litanias perficientibus.

Ut nos exaudire digneris, te rogamus, audi nos.

Fili Dei, te rogamus, audi nos.

Agnus Dei, qui tollis peccata mundi, parce nobis, Domine.

Agnus Dei, qui tollis peccata mundi, exaudi nos, Domine.

Agnus Dei, qui tollis peccata mundi, miserere nobis.

Christe, audi nos. Christe, exaudi nos.

Kyrie, eleison. Christe, eleison. Kyrie, eleison.

Quibus dictis, surgunt omnes, et Pontifex, deposita mitra, dicit stans versus altare :

OREMUS.

Accumbit genua Da, quæsumus, *off. Levate* Ecclesiæ tuæ, misericors Deus, ut Spiritu sancto congregata, secura tibi devotione servire mereatur. Per Dominum.... in unitate ejusdem. r. Amen.

Deinde Pontifex ascendit ad sedem sibi paratam in plano altaris ; imponit incensum in thuribulum et benedicit more solito. Diaconus, benedictione accepta a Pontifice, cantat in loco convenienti :

Sequentia sancti Evangelii secundum

LUCAM, c. 9.

In illo tempore : Convocatis Jesus duodecim Apostolis, dedit illis virtutem et potestatem super omnia dæmonia, et ut languores curarent. Et misit illos prædicare regnum Dei, et sanare infirmos. Et ait ad illos : Nihil tuleritis in via, neque virgam, neque peram, neque panem, neque pecuniam : neque duas tunicas habeatis. Et in quamcumque domum intraveritis, ibi manete, et inde ne exeatis. Et quicumque non receperint vos, exeuntes de civitate illa, etiam pulverem pedum vestrorum excutite in testimonium super illos. Egressi autem circuibant per castella, evangelizantes et curantes ubique.

Quo finito, liber Evangeliorum osculatur a Pontifice, qui et deinde incensatur. Quo facto, Pontifex, genuflexus, aliisque omnibus genuflectentibus, incipit cantando, schola prosequente, hymnum :

Veni, Creator Spiritus,
Mentes tuorum visita,
Imple superna gratia,
Quæ tu creasti pectora.

Qui diceris Paracletus,
Altissimi donum Dei,
Fons vivus, ignis, caritas,
Et spiritalis unctio.

Tu septiformis munere,
Digitus paternæ dexteræ,
Tu rite promissum Patris,
Sermone ditans guttura.

Accende lumen sensibus,
Infunde amorem cordibus,
Infirma nostri corporis
Virtute firmans perpeti.

Hostem repellas longius,
Pacemque dones protinus ;
Ductore sic te prævio,
Vitemus omne noxium.

Per te sciamus, da Patrem,
Noscamus atque Filium,
Teque utriusque Spiritum
Credamus omni tempore.

Deo Patri sit gloria
Et Filio, qui a mortuis,
Surrexit, ac Paracleto,
In sæculorum sæcula. Amen.

Doxologia communis

Deo Patri sit Gloria.
Ejusque soli Filio,
Cum Spiritu Paraclito,
Nunc et per omne sæculum.

Finito primo versu, Pontifex surgit, ac similiter omnes alii cum Pontifice surgunt. Expleto hymno, omnes sedent in silentio, et Pontifex, sedens, alloquitur Synodum.

Post allocutionem, sermoneque habito, si fieri debet, Promotores Synodi his verbis, requirunt ut legatur Decretum de *Aperienda Synodo* :

Illustrissime ac Reverendissime Domine, cum Diœcesis Marianopolitanæ Synodi, per Decretum diei.... mensis.... anni.... dies præsens adsit, nosque Amplitudo Vestra jam in prima Congregatione, Promotores constitueris, pro nostri officii munere comparantes, instamus ac requirimus hanc Diœcesanam Synodum jam rite denuntiata atque promulgata, hac ipsa die per Vos deliberari et declarari incipere, jamque inceptam esse. Cujus prosperum et optamus successum, et à Deo supplices piis orationibus deprecamur.

Tunc Secretarius legit ex suggestu Decretum de *Aperienda Synodo* ; statimque Decretum de *modo vivendi Synodi tempore*. Deinde Pontifex dicit :

Quoniam ad hujus Synodi progressionem nonnulli adju-
tores et ministri requiruntur, constituimus :

Præfectum Hospitiorum, Rev. N.

Promotores Synodi, RR. N. N.

Secretarium Synodi, Rev. N.

Pro-Secretarium, Rev. N.

Notarium Synodi, Rev. N.

Procuratores Cleri, RR. N. N.

Magistros Cœremoniarum, RR. N. & N.

Ostiariorum, RR. N. N.

Æconomum, Rev. N.

Deinde sub pœnis à jure statutis inhibemus ne quis eorum qui huic Diœcesanæ Synodo interesse debent ex hac civitate discedere præsumat, nisi discessus causa à Nobis approbata.

Nunc vocabuntur omnes qui huic Synodo interesse debent, qui ordine nominatim vocati surgunt et respondent singuli : Adsum....

Tunc Secretarius nomina omnium sic proclamat qui Synodo interesse tenentur :

Rev. N.

Quibus expeditis, Promotores sic requirunt ut Decretum de *Professione Fidei* legatur.

Illustrissime ac Reverendissime Domine, Sacrosancti

Concilii Tridentini Decreto constitutum et sancitum est ut omnes qui in Synodo Diæcesana convenire debent, in ea Synodo quæ primo quoque tempore celebrabitur, omnia et singula à Tridentinis Patribus definita et statuta palam recipiant, veram obedientiam Summo Pontifici Romano spondeant, simulque hæreses omnes publice detestentur et anathematizent. Ideo nos, N. N., hujus Synodi Promotores ab Illustrissima ac Reverendissima Amplitudine Vestra petimus, in hac Synodo Diæcesana, omnia ab iis qui tenentur, juxta Tridentinam sanctionem, præstari.

Tunc Secretarius legit Decretum *de Professione Fidei* nec non formulam ejusdem Professionis, quam omnes Fidem professuri totidem verbis simul repetant. Qua absoluta, bini, terni, vel quaterni ad Episcopum accedent et coram eo genuflexi, super exposita Sacrosancta Evangelia jusjurandum singulatim in hunc modum proferent :

Ego idem N. N. spondeo, voveo, ac juro. Sic me Deus adjuvet, et hæc sancta Dei Evangelia.

FORMA PROFESSIONIS

FIDEI CATHOLICÆ, APOSTOLICÆ ET ROMANÆ.

Ego N... firma fide credo, et profiteor omnia et singula, quæ continentur in Symbolo fidei, quo sancta Romana Ecclesia utitur ; videlicet,

Credo in unum Deum, Patrem omnipotentem factorem cœli et terræ, visibilium omnium, et invisibilium. Et in unum Dominum Jesum Christum, Filium Dei unigenitum. Et ex Patre natum, ante omnia sæcula. Deum de Deo, lumen de lumine, Deum verum de Deo vero. Genitum, non factum, consubstantialem Patri, per quem omnia facta sunt. Qui propter nos homines, et propter nostram salutem descendit de cœlis. Et incarnatus est de Spiritu sancto ex Maria Virgine : et Homo factus est. Crucifixus etiam pro nobis sub Pontio Pilato, passus et sepultus est. Et resurrexit tertia die, secundum Scripturas. Et ascendit in cœlum, sedet ad dexteram Patris. Et iterum venturus est cum gloria judicare vivos et mortuos ; cujus regni non erit finis. Et in Spiritum sanctum Dominum, et vivifi-

cantem, qui ex Patre Filioque procedit. Qui cum Patre et Filio simul adoratur, et conglorificatur : qui locutus est per Prophetas. Et Unam Sanctam Catholicam et Apostolicam Ecclesiam. Confiteor unum Baptisma in remissionem peccatorum. Et expecto resurrectionem mortuorum. Et vitam venturi sæculi. Amen.

Apostolicas et Ecclesiasticas traditiones, reliquasque ejusdem Ecclesiæ observationes, et constitutiones firmissime admitto et amplector.

Item sacram Scripturam juxta eum sensum, quem tenuit et tenet sancta Mater Ecclesia, cujus est judicare de vero sensu et interpretatione sacrarum Scripturarum, admitto ; nec eam unquam, nisi juxta unanimum consensum Patrum accipiam et interpretabor.

Profiteor quoque septem esse vere et proprie Sacramenta novæ Legis, à Jesu Christo Domino nostro instituta, atque ad salutem humani generis, licet non omnia singulis, necessaria, scilicet Baptismum, Confirmationem, Eucharistiam, Pœnitentiam, Extremam unctionem, Ordinem, et Matrimonium ; illaque gratiam conferre, et ex his Baptismum, Confirmationem, et Ordinem, sine sacrilegio reiterari non posse.

Receptos quoque et approbatos Ecclesiæ Catholicæ ritus, in supradictorum solemnè administratione recipio et admitto.

Omnia et singula quæ de peccato originali et de justificatione in sacrosancta Tridentina Synodo definita et declarata fuerunt, amplector et recipio.

Profiteor pariter in Missa offerri Deo Verum, proprium et propitiatorium Sacrificium, pro vivis et defunctis ; atque in sanctissimo Eucharistiæ Sacramento esse vere, realiter et substantialiter corpus, et sanguinem, una cum anima et divinitate Domini nostri Jesu Christi, fierique conversionem totius substantiæ panis in corpus, et totius substantiæ vini in sanguinem, quam conversionem Catholica Ecclesia Transubstantiationem appellat.

Fateor etiam, sub altera tantum specie, totum atque integrum Christum, verumque Sacramentum sumi.

Constanter teneo Purgatorium esse, animasque ibi de-
tentas fidelium suffragiis juvari.

Similiter et Sanctos una cum Christo regnantes, vene-
randos, atque invocandos esse ; eosque orationes Deo pro
nobis offerre ; atque eorum reliquias esse venerandas.

Firmissime assero, imagines Christi, ac Deiparæ semper
Virginis, necnon aliorum Sanctorum habendas et retinen-
das esse, atque eis debitum honorem ac venerationem
impertiendam.

Indulgentiarum etiam potestatem à Christo in Ecclesia
relictam fuisse, illarumque usum Christiano populo maxi-
me salutarem esse affirmo.

Sanctam, Catholicam, et Apostolicam Romanam Eccle-
siam, omnium Ecclesiarum matrem et magistram agnos-
co ; Romanoque Pontifici, Beati Petri Apostolorum Princi-
pis successori, ac Jesu Christi Vicario veram obedientiam
spondeo ac juro.

Cætera item omnia à sacris Canonibus et œcumenicis
Conciliis, ac præcipue à sacrosancta Tridentina Synodo
tradita, definita, et declarata, indubitanter recipio atque
profiteor ; simulque contraria omnia, atque hæreses quas-
cumque ab Ecclesia damnatas, et rejectas et anathematiza-
tas, ego pariter damno, rejicio, et anathematizo.

Hanc veram Catholicam fidem, extra quam nemo salvus
esse potest, quam in præsentì sponte profiteor, et vera-
citer teneo, eandem integram et inviolatam, usque ad
extremum vitæ spiritum, constantissime, Deo adjuvante,
retinere et confiteri, atque à meis subditis, vel illis, quo-
rum cura ad me in munere meo spectabit, teneri, doceri,
et prædicari, quantum in me erit, curaturum.

Post professionem Fidei, Promotores sic requirunt à Secretariis ut
rerum gestarum in hac prima Sessione instrumentum conficiant :

Nos, N. N., hujus Synodi Diæcesanæ Promotores, roga-
mus vos ejusdem Synodi Secretarios, hic præsentès, ut de

omnibus et de singulis in hac Sessione peractis, unum plurave conficiatis instrumenta.

Secretarii respondent :

Conficiemus.

Pastremo charitative monentur omnes ab Episcopo quod durante Synodo, honeste se habeant in omnibus, et extra ita quod eorum conversatio cæteris sit merito in exemplum. Quo facto, surgit Pontifex, et solemniter omnibus benedicit, dicens :

Sit nomen Domini benedictum, etc.

More consueto : quo dicto, discedunt omnes.

SESSIO SECUNDA.

Secunda die conveniunt iterum omnes in Ecclesia. Hac secunda die Synodi, mos est ut unus ex canonicis missam solemniter faciat *pro Defunctis*, cui Episcopus assistit; eaque peracta, Stolum et Pluviale nigri coloris assumit, et consuetas orationes recitat pro Defunctis, post quas, vestes nigras in rubeas mutat, et accepto Pastoralis Baculo, procedit coram altari, Diacono et Subdiacono paratis ut supra, ipsum associantibus, et ibi in soldistorio ante medium altaris genuflexus, deposita mitra, inchoat, schola prosequente, antiphonam :

Propitius esto peccatis nostris, Domine, nequando dicant gentes : Ubi est Deus eorum ?

Finita antiphona et incepto Psalmo, sedet Pontifex, reassumpta mitra, usque ad finem Psalmi.

PSALMUS 78.

Deus, venerunt gentes in hæreditatem tuam, polluerunt templum sanctum tuum : * posuerunt Jerusalem in pomorum custodiam.

Posuerunt morticina servorum tuorum, escas volatilibus cæli : * carnes sanctorum tuorum bestiis terræ.

Effuderunt sanguinem eorum tanquam aquam in circuitu Jerusalem ; * et non erat qui sepeliret.

Facti sumus opprobrium vicinis nostris ; * subsannatio et illusio his, qui in circuitu nostro sunt.

Usquequo, Domine, irasceris in finem ; * accendetur velut ignis zelus tuus ?

Effunde iram tuam in gentes, quæ te non noverunt : * et in regna, quæ nomen tuum non invocaverunt.

Quia comederunt Jacob: * et locum ejus desolaverunt.

Ne memineris iniquitatum nostrarum antiquarum, cito anticipent nos misericordiæ tuæ: * quia pauperes facti sumus nimis.

Adjuva nos, Deus, salutaris noster; et propter gloriam nominis tui, Domine, libera nos, * et propitius esto peccatis nostris, propter nomen tuum.

Ne forte dicant in gentibus: Ubi est Deus eorum? * et innotescat in nationibus coram oculis nostris.

Ultio sanguinis servorum tuorum, qui effusus est, * introeat in conspectu tuo gemitus compeditorum.

Secundum magnitudinem brachii tui, * posside filios mortificatorum.

Et redde vicinis nostris septuplum in sinu eorum: * improperium ipsorum, quod exprobraverunt tibi, Domine.

Nos autem populus tuus, et oves pascuæ tuæ, * confitebimur tibi in sæculum.

In generationem et generationem * annuntiabimus laudem tuam.

Gloria Patri.

Deinde finito Psalmo, et repetita antiphona, Pontifex, deposita mitra, surgit, et stans versus altare dicit:

OREMUS.

Nostrorum tibi, Domine, curvantes genua cordium, quæsumus, ut bonum quod in nobis a te requiritur, exequamur, scilicet, ut prompta tecum sollicitudine gradientes, discretionis arduæ subtile iudicium faciamus, ac misericordiam diligentes, clareamus studiis tibi placitæ actionis. Per Christum Dominum nostrum. R. Amen.

OREMUS.

Mentibus nostris, quæsumus, Domine, Spiritum sanctum benignus infunde, quatenus in nomine tuo collecti, sic in cunctis teneamus cum moderamine pietatis justitiam, ut hic à te in nullo dissentiat voluntas nostra; sed semper rationabilia meditantes, quæ tibi sunt placita, et dictis exequamur, et factis. Per Dominum.... in unitate ejusdem.... R. Amen.

OREMUS.

Richardus gamma - J. L. L. L.
 Deus, qui nos justitiam loqui, et quæ recta sunt præcipis
 judicare : tribue nobis, ut neque iniquitas in ore, nec pra-
 vitas inveniatur in mente ; ut puro cordi purior sermo con-
 sentiat ; ostendatur in opere justitia, neque appareat dolus
 in lingua, sed ex corde veritas proferatur. Per Dominum....
 R. Amen.

Post hæc, Pontifex ascendit ad planum altaris ; imponit incensum
 et benedicit Diacono qui cantat Evangelium ut heri.

Sequentia sancti Evangelii secundum

Lucam. Cap. 10.

In illo tempore ; Designavit Dominus et alios septuaginta
 duos, et misit illos binos ante faciem suam in omnem
 civitatem et locum quo erat ipse venturus. Et dicebat illis :
 Messis quidem multa, operarii autem pauci. Rogate ergo
 Dominum messis, ut mittat operarios in messem suam.
 Ite : ecce ego mitto vos sicut agnos inter lupos. Nolite
 portare sacculum, neque peram, neque calceamenta, et ne-
 minem per viam salutaveritis. In quamcumque domum
 intraveritis, primum dicite : Pax huic domui ; et si ibi
 fuerit filius pacis, requiescet super illum pax vestra : sin
 autem, ad vos revertetur. In eadem autem domo manete
 edentes et bibentes, quæ apud illos sunt : dignus est enim
 operarius mercede sua. Nolite transire de domo in do-
 mum. Et in quamcumque civitatem intraveritis, et susce-
 perint vos, manducate quæ apponuntur vobis : et curate
 infirmos, qui in illa sunt, et dicite illis : Appropinquavit in
 vos regnum Dei.

Quo finito, et per Pontificem libro osculato et ipso incensato, Pon-
 tifex incipit, schola prosequente, hymnum : *Veni, Creator*, pag. 15.
 Expleto hymno, Pontifex alloquitur Synodum, si velit.

Postea, his verbis Promotores requirunt promulgationem Constitu-
 tionum per Synodum approbandarum :

Illustrissime ac Reverendissime Domine, Decreta, in
 novissima Congregatione sancita, in hac secunda Diœcesis.

næ Synodi Sessione edici et promulgari, omni debita reverentia, instamus et requirimus.

Tunc Secretarius dictas constitutiones promulgat. His peractis, Promotores à Secretariis requirunt, ut heri, confectionem rerum in hac Sessione gestarum Instrumenti, et Pontifex surgens, benedicit omnibus solemniter, ac omnes discedunt.

SESSIO TERTIA et ULTIMA.

Die tertia, conventione facta in Ecclesia, unus pariter ex Canonicis missam celebrat *de Sanctissima Trinitate*, addicta collecta in gratiarum actionem ; Episcopus assistat indutus Stola et Pluviali albi coloris. Missa absoluta, rubea accipit indumenta, assistantibus sibi Diacono et Subdiacono paratis, et genuflexus in faldistorio, incipit, schola prosequente, Antiphonam :

Exaudi, etc.

Cum Psalmo :

Salvum me fac, etc.

Ut supra in primo die. Quibus finitis Pontifex, surgit et stans versus ad altare dicit :

OREMUS.

Ad te, Domine, interni clamoris vocibus proclamantes, unanimiter postulamus : ut respectu tuæ gratiæ solidati, præcones veritatis efficiamur intrepidi, tuumque valeamus verbum cum omni fiducia loqui. Per Dominum... R. Amen.

OREMUS.

Omnipotens, sempiternæ Deus, qui sacro verbi tui oraculo promisisti, ubi duo, vel tres in nomine tuo congregati essent, te medium fore : adesto cætui nostro propitius, et cor nostrum illumina misericors, ut à bono misericordiæ tuæ nullatenus aberremus, sed rectum justitiæ tuæ tramitem in omnibus teneamus. Per Dominum.... R. Amen.

OREMUS.

Et ministri dicunt :

Flectamus genua.

r. Levate.

Deus, qui populis tuis et indulgentiâ consulis, et amore dominaris : da Spiritum sapientiæ tuæ, quibus dedisti regimen disciplinæ, ut de profectu sanctarum ovium fiant gaudia æterna Pastorum. Per Dominum.... in unitate ejusdem.... R. Amen.

Post hæc Pontifex ascendit ad planum altaris, imponit incensum in thuribulum; deinde benedicit Diacono, qui cantat Evangelium, ut heri.

Sequentia sancti Evangelii secundum

Matthæum. c. 18.

In illo tempore : dixit Jesus discipulis suis : Si peccaverit in te frater tuus, vade, et corripe eum inter te et ipsum solum : Si te audierit, lucratus eris fratrem tuum. Si autem te non audierit, adhibe tecum adhuc unum vel duos, ut in ore duorum vel trium testium stet omne verbum. Quod si non audierit eos, dic Ecclesiæ. Si autem Ecclesiam non audierit, sit tibi sicut ethnicus, et publicanus. Amen dico vobis, quæcumque alligaveritis super terram, erunt ligata et in cælo : et quæcumque solveritis super terram, erunt soluta et in cælo. Iterum dico vobis : quia si duo ex vobis consenserint super terram, de omni re quacumque petierint, fiet illis à Patre meo, qui in cælis est. Ubi enim sunt duo vel tres congregati in nomine meo, ibi sum in medio eorum. Tunc accedens Petrus ad eum dixit ; Domine, quoties peccabit in me frater meus, et dimittam ei ? usque septies ? Dicit illi Jesus : Non dico tibi usque septies ; sed usque septuagies septies.

Quo finito, et per Pontificem libro osculato, et ipso incensato, Pontifex genuflexus, incipit hymnum : *Veni Creator*.

Expleto hymno, omnes sedent in silentio ; tunc Pontifex Synodum alloquitur, si velit.

Post Allocutionem, Promotores requirunt, his verbis, promulgationem Decretorum, si quæ sint per Synodum approbanda.

Illustrissime ac Reverendissime Domine, Decreta, in novissima Congregatione sancita, in hac tertia et ultima Diæ-

cesanæ Synodi Sessione, edioi et promulgari, omni debita reverentia, instamus et requirimus.

Tunc Secretarius promulgat Decreta. Quibus lectis, Promotores requirunt appellationem omnium qui Synodo interesse tenentur :

Ecclesiasticæ disciplinæ legibus innixi, instamus et petimus omnes qui huic Synodo interesse tenentur nominatim vocari, et contra absentes qui per se, seu per alios, constituto tempore legitime non comparuerunt, prout juris fuerit, agi et procedi.

Tunc Secretarius legit ut in prima Sessione, nomina omnium qui Synodo interesse debent et præsentés ad sua nomina surgunt, et respondent singuli : Adsum.

Absentes vero notantur, et per Pontificem debita pœna mulctantur.

Quo facto, Promotores requirunt promulgationem Decreti *de Fine Synodi* :

Cum ea quæ ad restitutionem et conservationem christianæ Disciplinæ in hac Diœcesi, pro hujus temporis ratione, agenda videbantur, Deo auctore et adjutore, confecta sint, nos hujus Synodi Promotores, instamus ac petimus ut huic finem imponere, et jam imponi decernatis.

Tunc Secretarius sequentem supplicationem legit :

Illustrissime ac Reverendissime Domine, placetne vobis ad laudem Dei omnipotentis, hujus Synodi Diœcesanæ finem jam fieri ?

Pontifex respondet :

Placet :

Et adhuc sedens, si velit, Synodum alloquitur, commendat se omnium orationibus, et surgens incipit :

Te Deum laudamus : * te Dominum confitemur.

Te æternum Patrem * omnis terra veneratur.

Tibi omnes Angeli, * tibi Cœli, et universæ Potestates,

Tibi Cherubim et Seraphim * incessabili voce proclamant :

Sanctus,

Sanctus.

Sanctus, * Dominus Deus Sabaoth.
 Pleni sunt cœli et terra * majestatis gloriæ tuæ.
 Te gloriosus * Apostolorum chorus,
 Te Prophetarum * laudabilis numerus,
 Te Martyrum candidatus * laudat exercitus.
 Te per orbem terrarum * sancta confitetur Ecclesia,
 Patrem * immensæ majestatis,
 Venerandum tuum verum, * et unicum Filium :
 Sanctum quoque * Paraclitum Spiritum.
 Tu Rex gloriæ, * Christe.
 Tu Patris * sempiternus es Filius.
 Tu, ad liberandum suscepturus hominem, * non horrui-
 sti Virginis uterum.
 Tu, devicto mortis aculeo, * aperuisti credentibus regna
 Cœlorum.
 Tu ad dexteram Dei sedes * in gloria Patris.
 Judex crederis * esse venturus.
 Te ergo, quæsumus, tuis famulis subveni, * quos pretio-
 so sanguine redemisti.
 Æterna fac * cum Sanctis tuis in gloria numerari.
 Salvum fæe populum tuum, Domine, * et benedic hære-
 ditati tuæ.
 Et rege eos, * et extolle illos usque in æternum.
 Per singulos dies * benedicimus te.
 Et laudamus nomen tuum in sæculum, * et in sæculum
 sæculi.
 Dignare, Domine, die isto * sine peccato nos custodire.
 Miserere nostri, Domine, * miserere nostri.
 Fiat misericordia tua, Domine, super nos, * quemadmo-
 dum speravimus in te.
 In te, Domine, speravi, * non confundar in æternum.
 v. Benedicamus Patrem et Filium cum sancto Spiritu.
 r. Laudemus et superexaltemus eum in sæcula.

OREMUS.

Nulla est, Domine, humanæ conscienciæ virtus, quæ
 inoffense possit tuæ voluntatis judicia experiri ; et ideo,

quia imperfectum nostrum vident oculi tui, perfectioni deputa misericors Deus, quod perfecto æquitatis fine concludere peroptamus ; te in nostris principibus occursorem poposcimus ; te in hoc fine iudiciorum nostrorum indultorem nostris excessibus speramus ; scilicet, ut ignorantiam parcas, errori indulgeas, ut perfectis votis perfectam operis efficaciam largiaris ; et quia conscientia remordente tabescimus, ne aut ignorantia nos traxerit in errorem, aut præceps forsitan voluntas impulerit justitiam declinare ; hoc te poscimus, te rogamus, ut si quid offensionis in hac Synodi celebritate contraximus, te miserante, indulgentiam sentiamus ; ut in eo, quod soluturi sumus aggregatam Synodum, à cunctis primum absolvamur nostrorum nexibus delictorum ; qualiter, et transgressores venia, et confitentes tibi, subsequatur remuneratio sempiterna. Per Christum Dominum nostrum. R. Amen.

Oratione dicta, Promotores requirunt more solito, confectionem rerum gestarum in hac tertia et ultima Sessione Instrumenti.

Tandem Pontifex benedicit solemniter omnibus dicens :

Sit nomen Domini benedictum, etc.

Et dat Indulgentiam. Quibus peractis, Diaconus stans juxta Pontificem dicit alta voce :

Recedamus ^{cum} in pace.

Et respondent omnes :

In nomine Christi.

Tunc omnes pariter surgentes, Pontificem cappâ indutum, cum superpelliceis, ad Domum reducant, et recedunt in pace.

IMPRIMATUR.

✠ IG. EPISCOPUS MARIANOPOLITANUS.